



SCHWEIZERISCHE ARMEE  
ARMÉE SUISSE  
ESERCITO SVIZZERO

## Mir hänn's satt - mir DUUBEEn ab !!

*D DUUBEg'schicht wo mir verkinde  
duet uff Bibel-Schtelle grinde  
wyter gohts mit hoche Kunscht  
und ändet denn in diefer Brunscht:*

Em Abel het Kain DUUBE! gsait,  
das het dr Abel schlächt verdrait.

Dr lieb Gott drey, dr heilgi Gaischt  
chunnt as DUUBE - verfählt uns maischt -  
und die, wo doch no droffe wärde  
fiehle sich wie Schoof - as Härde.  
Schoof, wo sich gärn Briefli schriibe  
und gärn Spionage drübe  
(au d Mata Hari naime dure  
het miesse wiene DUUBE gurre).  
Fir Briefboscht, Ghaimnis, Zaubertripp  
e (Kampf-)Brief-DUUBE isch e Gligg!!

Dr Noah wär glatt au versoffe  
hät är nit sone DÜÜBLI droffe...

Fir in dr Wält dr Friide z'schitze  
will jede sich uff DUUBE schitze.  
Dr Picasso rief d PALOMA ane  
zem alli Guernicaner mahne.  
D PALOMA het uss DUUBEsaft -  
denn DUUBEsaft schterggt d Mannesgraft -  
drno grad no-n-e Parfum gmacht  
(dr Matthis schmeggt - si Aug wird glänzig:  
„I glaub do wird i DUUBEdänzig!“).

*Mit däre DUUBiose G'schicht  
goht d Milidärwält hart ins Gricht  
denn so Friidens-DUUBE-Drögg  
bringsch vo kainer Uniform nümme wäg.*

Im Schwytzer Milidär-Diergarte  
dörfe d DUUBE nümme schtarte,  
em Villiger sy Schparvorschlag  
haisst: Dootedanz im DUUBEschlag.  
Verbi: in DUUBio pro reo,  
's zelle nur no Tiger, Leo  
(und d DUUBE us em MFD  
han i au scho lang nümme gseh).

D Serbe hänn - ganz im Vergässe -  
die letschti Friidens-DUUBE gfrässe  
(doch schtergger fählt dr UNO z Gänf  
ze ihre Wirscht e DUUBE Sänf).

*Und mir as Alt-Ryslaifer-Grubbe  
dien als PAPAGENI uns entbubbe,  
denn bi unsre Clique-Männer  
het's Voogel- und au Wyybli-Fänger  
und unsri schrille Zaubersleete  
dien nit numme Schlange deete:  
Mir läbe sälig, hyt, nit morn,  
was intressiert d Armeersjorm  
denn.*

*Lieber e Schpatz in dr Gamälle  
as e DUUBE uffem Helm.*